

# BARAZA LA WAWAKILISHI ZANZIBAR

Simu Nam. + 255 24 2230602/1  
Fax Nam. + 255 24 2230215  
Tovuti: [www.zanzibarassembly.go.tz](http://www.zanzibarassembly.go.tz)



SANDUKU LA BARUA 902,  
ZANZIBAR  
Barua Pepe: [zahore@zanlink.com](mailto:zahore@zanlink.com)

## HOTUBA YA MAONI YA KAMATI YA MAENDELEO YA WANAWAKE, HABARI NA UTALII YA BARAZA LA WAWAKILISHI, KUHUSU UTEKELEZAJI WA MAAGIZO YA KAMATI YA

**MWAKA 2016/2017 - WIZARA YA HABARI UTALII UTAMADUNI NA MICHEZO**

### **Mheshimiwa Spika,**

Kwanza kabisa naomba kuchukuwa fursa hii kumshukuru Mwenyezi Mungu, kwa ukarimu wake wa kutupa uhai, afya njema na nguvu, tukaweza kukutana tena katika Chombo hiki muhimu katika nchi yetu kwa lengo la kuwawakilisha wananchi wa Zanzibar.

**Mheshimiwa Spika,** kwa mujibu wa maelekezo ya Kanuni ya 108(15) ya Kanuni za Kudumu za Baraza la Wawakilishi, Toleo la 2016 naomba kulijuilisha Baraza lako tukufu kwamba, Kamati ya Maendeleo ya Wanawake, Habari na Utalii ya Baraza la Wawakilishi imepitia Utekelezaji wa Maagizo ya Kamati yetu ya Mwaka 2016/2017 kwa Wizara ya Wizara ya Habari, Utalii, Utamaduni na Michezo.

**Mheshimiwa Spika,** katika Kipindi cha kazi cha mwaka 2016/2017 Kamati yangu ilitoa Maagizo kumi na Moja (11) kwa Wizara ya Habari, Utalii Utamaduni na Michezo.

Kamati inaamini kwamba uchache wa Maagizo haya unatokana na kwamba, masuala mengi yaliyojitokeza wakati wa kazi za kamati yalikuwa yakitolewa ufafanuzi wa kina na wahusika, pamoja na ushirikiano mzuri uliopatikana kati ya watendeji wa Wizara hii pamoja na Wajumbe wa Kamati yangu.

**Mheshimiwa Spika,** Kamati yangu inazidi kuisisitiza kwa Watendaji wa mawizara kushirikiana na kamati zote za Baraza la Wawakilishi na kuwapatia wajumbe wako, taarifa zote muhimu wanazozihitaji zinazohusiana na utendaji wa taasisi zao kwa lengo la kuhimiza uwazi na uwajibikaji katika taifa letu.

#### SEKTA YA UTALI

**Mheshimiwa Spika,** Katika agizo kwanza kwa Wizara hii linalohusiana na kuongeza fungu la Bajeti ya Kamisheni ya Utalii, Kamati imeridhika kwa kuongezwa kwa fungu hilo kutoka shilingi 208,505,000 (*Milioni Mia Mbili na Nane, laki Tano na Eflu Tano*) mwaka wa fedha uliopita hadi kufikia shilingi 366,590,000 (*Milioni Mia Tatu na Sitini na Sita, laki Tano na Tisini Eflu*) kwa mwaka huu wa fedha wa 2017/2018 ikiwa ni ongeeko la asilimia 76. Kamati inamini kwamba ongezeko hilo litasaidia kwa kiasi kikubwa kwenye Programu ya Utangazaji na Uhamasishaji wa Utalii kama alivyokwisha kueleza Mheshimiwa Waziri wa masuala ya Utalii.

Ni mategemeo ya Kamati yangu kwamba, kutakuwa na ongezeko kubwa la watalii hapo baadae kwa kuwafanya wavutike zaidi na warudi tena katika visiwa vyetu na hatimae nchi yetu kupata pato kubwa zaidi linalotokanana na sekta hii ya utalii.

**Mheshimiwa Spika,** Kuhusu Kadh-ya ya Ndugu Peter Sipano Obama ya Mradi wa "*Masai na Simba*" huko Kiwengwa, Kamati inaunga mkono hatua zinazochukuliwa na Kamisheni ya Utalii na tunazidi kushauri kufuatiliwa zaidi muwekezaji huyo, huku Kamati ya Ulinzi na Usalama ya Mkoa na Wilaya zikishirikishwa kikamilifu katika hatua zote zinazoendelea.

#### SEKTA YA HABARI

**Mheshimiwa Spika,** Kuhusiana na Suala la AGAPE na ZMUX, Kamati yangu inazidi kuisisitiza Wizara na Serikali kwa ujumla kuwa waangalifu wakati wa ufungaji wa mikataba pamoja na kuwashirikisha wanasheria wetu kwa kuangalia maslahi ya Taifa,

Matakwa ya Kisheria pamoja na Maslahi na Matakwa ya kitaalamu ili kujiepusha na matatizo yanayoweza kujitokeza hapo baadae.

**Mheshimiwa Spika**, kwa Upande wa ZBC, Kamati yangu inaridhishwa na mfumo ulipo hivi sasa wa utoaji wa taarifa za kutoka Mikoa yote ya Zanzibar. Aidha tunazidi kutoa pongezi zetu kwa ZBC kwa kuzipa umuhimu habari za vijijini ikiwemo matangazo ya kila siku ya moja kwa moja kutoka Pemba.

Vilevile Kamati imeridhika na utaratibu uliowekwa na ZBC kwa kubadilishana watendaji kati ya Studio ya Karume House Mnazi Mmoja na Mkoroshoni Pemba ikiwa ni njia moja wapo ya kubadilishana uzowefu.

Kamati inazidi kuipongeza tena ZBC kituo cha Dar es Salaam kwa jinsi wanavyotowa kipaombele kwa waheshimiwa kutoka Zanzibar wakati wanaposhiriki katika matukio mbali mbali huko Tanzania Bara.

#### SEKTA YA MICHEZO

**Mheshimiwa Spika**, Kamati ya Maendeleo ya Wanawake, Habari na Utalii inaunga mkono utaratibu ulielezwa na Mheshimiwa Waziri wa kuvisaidia vilabu vinavyoshiriki katika mashindano ya kimataifa.

Kamati inapenda kuchukua fursa hii kuviomba vilabu na wanamichezo kwa ujumla kuongeza bidii michezoni ili kuhakikisha visiwa vyetu vinazidi kutajika katika ulimwengu wa michezo ikiwa ni njia moja wapo ya kuitangaza nchi yetu kiutalii.

#### SEKTA YA UTAMADUNI

**Mheshimiwa Spika**, kamati yangu, inawashauri watendaji wa Idara ya Makumbusho na Mambo ya Kale kuyatumia ipasavyo mafunzo wanayoyapata juu ya ukusanyaji wa

mapato katika maeneo yao ili kuondokana na dhana iliyopo ya kushuka kwa mapato hayo katika sekta hiyo.

Aidha nikiwa namalizia katika Wiara hii ya Habari, Utalii Utamaduni na Michezo, Nizungumzie kidogo juu ya Agizo linalohusiana na suala la Utunzaji wa Majengo ya kihistoria, Kamati yangu inasisitiza juu ya kuongeza juhudi ya kuyalinda na kuyahami ikiwezekana hata kwa kuingia ubia ili kulinda historia yetu pamoja na kuongeza mapato ya Idara hii.

**Mheshiwa Spika** , Kwa kumaliza Hotuba yangu Kamati yangu inazidi kusisitiza kwa Wizara hii kuzidi kushirikiana na Kamati yangu ili kufanikisha vizuri majukumu tuliyopewa na Baraza letu tukufu.

### **Mheshimiwa Spika,**

Mwisho kabisa naomba kuchukua fursa hii kwa kuwashukuru Wajumbe wa Kamati kwa mashirikiano yao waliyonipa kuanzia mwanzo hadi mwisho wa kazi hii, kwa ruhsa yako naomba niwatambue kwa majina kama ifuatavyo:

- |                                    |                     |
|------------------------------------|---------------------|
| 1. Mhe. Ali Suleiman Ali (Shihata) | - Mwenyekiti        |
| 2. Mhe. Salha Mohammed Mwin'juma   | - Makamo Mwenyekiti |
| 3. Mhe. Maryam Thani Juma          | - Mjumbe            |
| 4. Mhe. Zaina Abdalla Salum        | - Mjumbe            |
| 5. Mhe. Hassan Khamis Hafidh       | - Mjumbe            |
| 6. Mhe. Jaku Hashim Ayoub          | - Mjumbe            |
| 7. Mhe. Mussa Fom Mussa            | - Mjumbe            |
| 8. Ndg. Himid Haji Choko           | - Katibu            |
| 9. Ndg. Mussa Issa Mussa           | - Katibu            |
| 10. Ndg. Amina Abeid               | - Mkalimani         |

Nimalizie kwa kuwashukuru Wajumbe wote wa Baraza la Wawakilishi kwa kunisikiliza kwa umakini na kwa utulivu mkubwa.

**Mheshimiwa Spika**, naomba kuwasilisha.

.....  
**Ali Suleiman Ali (SHIHATA)**

**Mwenyekiti,**

**Kamati ya Maendeleo ya Wanawake na Habari na Utalii,**

**Baraza la Wawakilishi,**

**Zanzibar.**